

В СУББОТУ 3-Й СЕДМИЦЫ ПО ПАСХЕ

В ПЯТОК ТРЕТИЯ СЕДМИЦЫ, ВЕЧЕРА,

**Обычная кафисма. На Господи воззвах: стихиры самогласны
мироносиц. Глас 2-й:**

Мироносицы жены, утру глубоку, ароматы взявша, Господня гроба достигша, яже не надеяхуся обретша помышляху благоговеюще каменному отвалению, и друга ко друзей глаголаху: где суть печати гроба? где есть Пилатова кустодия, и опасное утверждение? Бысть же возвеститель не разумевающим женам, блистайся ангел, и глаголай к ним: что с рыданием ищите живаго и оживотворившаго род человеческий? Воста Христос Бог наш из мертвых яко всемогущ, подаяй всем нам нетление и жизнь, просвещение и велию милость.

Почто мира со слезами, о ученицы растворяете, камень отвалися, гроб истопися: видите тлю животом попорченную, печати свидетельствующую явственно, спящих люте стражники непокоривых, смертное спасеся плотию Божию, ад рыдает. Текша радостию рцыте апостолом: умертвивый смерть Христос, перворожден из мертвых, вас предваряет в Галилеи.

Мироносицы рано бывша, и гроб Твой со тщанием достигша, искаху Тебе Христе, во еже помазати пречистое тело Твое. И ангеловыми глаголы огласившися, радостотворныя образы апостолом проповедаху, яко воскресе Начальник спасения нашего, пленивый смерть, миру же даруяй живот вечный и велию милость.

И Минен, 3. Слава: глас 6-й:

Мироносицы жены, гроба Твоего достигша, и печати гробныя видевши, не обретша же пречистаго тела Твоего, рыдающа со тщанием приидоша, глаголюща: кто украде наше упование? кто взят мертв нага смиренною помазан, Матери едино утешение? О како мертвыя ожививый умертвися? ад пленивый, како погребеша? Но воскресни Спасе самовластно, якоже рекл еси, тридневен, спасаяй души наша.

И ныне: Богородичен, глас 2-й:

Прежде сень законная, благодати пришедши: якоже бо купина не сгараша опаляема: тако Дева родила еси, и Дева пребыла еси. Вместо столпа огненнаго, Праведное возсия Солнце: вместо Моисея, Христос, Спасение душ наших.

Таже, Свете тихий:

На стиховне настояция стихиры воскресны. Глас 2-й:

Прежде век от Отца рождшемуся Божию Слову, воплощшемуся от Девы Марии, приидите поклонимся: Крест бо претерпев, погребению предадеся, яко Сам восхоте: и воскрес из мертвых, спасе мя заблуждающаго человека.

Стих: Господь воцарися, * в лепоту облечеся.

Христос Спас наш, еже на ны рукописание пригвоздив на Кресте заглади, и смертную державу упраздни: поклоняемся Его тридневному Воскресению.

Стих: Ибо утверди вселенную, * яже не подвижится.

Со архангелы воспоим Христово Воскресение: Той бо есть Избавитель и Спас душ наших, и в славе страшней и крепчей силе, паки грядет судити миру, егоже созда.

Стих: Дому Твоему подобает святиныя * Господи, в долготу дний.

Воскресение Твое Христе Спасе, всю просвети вселенную и призвал еси Твое создание: всесильне Господи слава Тебе.

Слава, и ныне, глас 5:

Тебе одеющагося светом яко ризою снем Иосиф с Древа с Никодимом, и видев мертва нага непогребена, благосердный плач восприим, рыдая глаголаше: увы мне сладчайший Иисусе, Егоже вmale солнце на Кресте висима узревшее мраком облагашеся, и земля страхом колебашеся, и раздирашеся церковная завеса: но се ныне вижу Тя, мене ради волею подъемша смерть. Како погребу Тя Боже мой, или какою плащаницею обвию? коима ли руками прикоснуса нетленному Твоему телу? или кия песни воспою Твоему исходу Щедре, величаю страсти Твоя, песнословлю и погребение Твое со Воскресением, зовый: Господи слава Тебе.

Таже, Ныне отпуцаеши: Трисвятое. Тропар, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава: глас тойже.

Егда снизшел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же исления явился чуждь. Но возопийте: воскрес Господь, подай миру велию милость.

Аще ли иматъ святыи тропарь, глаголем прежде тропарь: Благообразный Иосиф: Слава: святаго: И ныне: Мироносицам женам: [Тропарь: Благообразный Иосиф: и тропарь воскресен: Егда снизшел еси к смерти: в вечер глаголем их прменяюще, во всю седмицу.

Ектения, и отпуст. Сиче служба бывает и во всех пятках Пятдесятницы.

В СУББОТУ 3-Й СЕДМИЦЫ ПО ПАСХЕ
В СУББОТУ СЕДМИЦЫ ПО ПАСЦЕ, НА УТРЕНИ,

Начало обычное.

На **Бог** Господь: тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость. [Дважды].

Слава: глас тойже.

Егда снизшел еси к смерти, животе бессмертный, тогда ад умертвил еси блистанием Божества. Егда же и умершие от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явился чуждь. Но возопийте: воскрес Господь, подай миру велию милость.

[Аще есть тропарь святого, глаголем тропарь прежде: Благообразный Иосиф: единожды. И тропарь: Егда снизшел еси: единожды. Слава: святого: И ныне: Мироносицам женам:]

По 1-м стихословии, седален, глас 2-й:

Камень гробный запечатати не возбравив, камень веры воскресый, подал еси всем, Господи слава Тебе.

Стих: Воскресни Господи Боже мой, да вознесется рука Твоя * не забуди убогих Твоих до конца.

Недро пречистое в вышних не истощивый, погребение и Воскресение за всех приял еси: Господи слава Тебе.

Слава, и ныне: Богородичен:

Вся паче смысла, вся преславная Твоя, Богородице, таинства, чистоте запечатанной, и девству храниму, Мати позналася еси неложна, Бога рождши истиннаго: Того моли, спаситися душам нашим.

По 2-м стихословии, седален, глас 2-й:

Подобен: Мироносицам женам:

Учеников Твоих лик, с мироносицами женами, радуется согласно: общий бо праздник с ними празднуем, в славу и честь Твоего Воскресения, и теми вопием Ти: Человеколюбче Господи, людем Твоим подаждь велию милость.

Слава, и ныне: тойже.

Воскресение Христово: и псалом 50. Канон праздника, со ирмосы на 8: и Миней на 4. Кондак и експостиларий праздника.

Песнь 1. Глас 2-й:

Ирмос: Моисейскую песнь восприимши, возопий душе: Помощник и Покровитель бысть мне во спасение, Сей мой Бог, и прославляю Его.

Распялся еси плотию, безстрастный естеством Отчим: прободен был еси в ребра, источивый миру кровь и воду: Ты Бог наш, и прославляем Тя.

Крест Твой почитаю, и погребение славлю Блаже, и пою, и покланяюся востанию Твоему, и взываю: Ты Бог наш, и прославляем Тя.

Аще и вкусил еси желчи, сладосте церковная, но источил еси нам нетление от ребр Твоих: Ты Бог наш, и прославляем Тя.

Вменился еси Спасе с мертвыми, мертвыя воздвигнувый, вкусил еси тли: истления бо всяко не познал еси: Ты Бог наш, и прославляем Тя.

Да веселится Сион, да радуется и небо, воскресе Христос, мертвыя воздвигнувый, песнословящия: Ты Бог наш, и прославляем Тя.

Плащаницами обвив Иосиф тело Твое Христе, во гробе нове положи Ты спасение: Ты же мертвыя яко Бог воскресил еси.

Слава: Всесвятая Троице, едино Божество, безначальная Единице, Отче и Сыне и Божественный Душе, спасай мир: Ты Бог наш, и прославляем Тя.

И ныне: Древнюю клятву разрешивши Чистая, во утробе Твоей возростила еси нам благословение, Младенца родивши: Сей бо Бог, аще и плоть носит.

И святого Миней на 4.

Песнь 3.

Ирмос: Неплодствовавший мой ум, плодоносен Боже покажи ми, делателю добрых насадителю благих, благоутробием Твоим.

Длани на Кресте простерл еси Иисусе, языки вся от прелести собрав, к познанию Твоему созвал еси Спасе.

Иудейстии людие Пилату вопиют: отпусти нам злодейственного разбойника, возми, возми распни Безгрешного.

Распеншуся Тебе Христе, помрачися свет, земля потрясется, и из гробов мертвии востаща мнози, страхом державы Твоея.

Предстоящи Кресту Агница Твоя Иисусе, плачем вопияше: камо идеши Сыне? камо грядеши Агнче, за всех заклавыйся?

Покланяюся Твоему Кресту, воспеваю и погребение, почитаю страсти, и гвоздя руку, и копие Иисусе, и Воскресение Твое.

Воскресл еси Иисусе, пленен бысть враг, Адам избавися, и Ева с ним от уз и тли, Воскресением Твоим.

Слава: Со Отцем и Сыну и Духу Правому, единому Естеству поклоняюся и воспеваю, Лицы разделяя, и Существом соединяя.

И ныне Богородичен: Блаженна еси Чистая, из корене Иессеова сущая, из негоже жезл и цвет Христа, по плоти нас ради возрадившая.

И святого Минея на 4.

По 3-й песни, седален и кондак святого.

Песнь 4.

Ирмос: Еже от Девы Твое рождество пророк предзря, воспроповедаше вопия: слух Твой услышах, и убояхся, яко от юга и из горы святыя приосененный пришел еси Христе.

Крестом пленил еси адово чрево, и совоздвигл еси мертвые, и смерти разрушил еси мучительство: темже иже от Адама поклоняющияся, поем погребение Твое и востание Христе.

Благоволивый Спасе наш, за благоутробие милости пригвоздитися на Кресте, и от праотчия избавити ны клятвы, разреши узы многих моих согрешений: можеши бо, елика хочещи творити.

На Кресте пригвоздивый мою древнюю клятву, и источивый мне Спасе, благословение кровию от ребр Твоих, разреши узы многих моих согрешений: можеши бо, елика хочещи, творити.

Ад Спасе, срет Тя в преисподних, огорчися помышляя, яко яже древле пожрети возмогий, ныне неволею отдав, истязуется в дольних, и пленяемь и обнажаемь бывает мертвых.

Аще и камень запечатася с кустодиею, о беззаконнии врази, но воскресе Господь, якоже прорече, разрешая узы многих моих согрешений: может бо, елика хочет, творити.

Воскресый из гроба, и пленивый ада, и ожививый мертвые, и нетление источивший мне Твоим востанием, разреши узы многих моих согрешений: можеши бо, елика хочещи, творити.

Слава: Пресущнаго Божества нераздельную славу, кто возможет изреци? Едино бо Естеством сущи Троица поется безначальная, срасленная яко Единица, в Троице певаемая Ипостасьми простыми.

И ныне, Богородичен: Во чрево Твое всельшагося безмужно рождающая Мати Дево Чистая, непрестанно моли яко Богородица, разрешити узы многих моих согрешений: можеши бо, елика хочещи помощи.

И святого Минея на 4.

Песнь 5.

Ирмос: Мглу души моя Спасе мой разгнав светом заповедей Твоих озари мя, яко един Царь мира.

Ты первую одежду мою, юже ми истка, увы мне, сеятель греха, совлека еси Спасе мой, облекся в мя.

Листвие смоковное спи мне грех мой, увы мне, не сохраншему, Спасе мой, пречистую заповедь Твою, змииным советом.

Уязвившуюся душу мою разбойническими помышленьми моими, представый иже от Марии, и елей возлив, исцели Христос.

У Креста предстоящи Пречистая Богородица, матерски зываше: оставил Мя еси единому, о Сыне Мой и Боже!

Ты злоначального змия оружием Креста Твоего низложив, Твоим восанием, сокрушил еси жало смерти Иисусе.

Где твое, смерте, жало? где твоя, аде, победа? Адам да свопиет: сокрушился

Слава: Тебе Богу и Отцу, и Сыну, и Духу покланяюся, трем Ипостасем, и едино три верую, Существом единым.

И ныне, Богородичен: Тя безсеменным Рождеством родившую паче естества обновившаго естество, Христа единого Владыку воспеваем вернии.

И святого Минея на 4.

Песнь 6.

Ирмос: Во глубине греховней содержимь есмь Спасе, и в пучине житейстей обуреваемь: но якоже Иону от зверя, и мене от страстей возведи, и спаси мя.

Мертв есть ад, дерзайте земнороднии, Христос бо на Древе висий, верже оружие нань, и лежит мертв: яже бо имяше, пленися обнажився.

Пленися ад, дерзайте мертвии, и гроби отверзошася, встаните от ада, вопиет вам Христос, вся пришедый избавити от смерти и тли.

Мертвыя якоже возмог пожерл еси иногда, ныне истязуемь аде, отдаждь Ми, вопиет тебе Жизнодавец и Бог, вся пришедый избавити от насытаго твоего чрева.

Жены мироносицы, что тщитесь прочее? что же живому мира приносите, воскресе Христос, якоже предрече. Да престанут вапша слезы, прешедшия на радость.

Плащаницею Тя Христе обвив Иосиф благообразный, во гробе положи: миропомазав же разоренный Твоего телесе храм, привали камень великий ко гробу.

Господь воскрес пленивый врага, и узники исторгнув, возведе вся, и первозданного Адама, того возставляя, яко Благоутробен и Человеколюбец Бог.

Слава: Троицу во Единстве воспоим вернии, с Сыном Отца славяще, и Духа единосущна Сыну, и суща во Отце собезначального и присносущнаго Бога.

И ныне, Богородичен: Во чреве неводеланно зачала еси Чистая, нетления грозд, яко лоза: из неяже безсмертия токи, якоже вино нам источают вечную жизнь.

И святаго Минея на 4.

По 6-й песни кондак празднику: глас 2-й:

Радоватися мироносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскрес от гроба.

Икос:

На гроб Твой Спасе мироносицы идущия, к себе недоумеваяху умом, и вещаху: кто нам камень отвалит гробный? И возревша видят, яко камень отвален бе, зраку же ангелову со одеянием дивляхуся: содержими же бяху трепетом, и бежати помышляху. и к ним юноша возопи: не бойтесь вы, Егоже ищите воста, приидите, видите место, идеже лежаше тело Иисусово, и скоро шедшия возвестите учеником: Спас воскрес от гроба.

Песнь 7.

Ирмос: Херувимы подражающе отроцы в пещи ликовствоваху, вопиюще: благословен еси Боже, яко истиною и судом навел еси сия вся, грех ради наших: препетый и препрославленный во вся веки.

Ты яко Человеколюбец, хотяй вся спасти от прелести, яже создал еси, претерпел еси пригвоздиться на Кресте: да погребенный образ страстьми, сей плотию Твоею обновивши Спасе, и ад низложив, воскресил еси и умерших с Собою.

На Кресте возвышаемь, вся призвал еси к Себе Щедре, якоже обещал еси Блаже: яко воистинну вся сия грехов ради наших пострадати благоволил еси. Темже и разбойнику райская врата отверзл еси Спасе.

Ты храм телесный воздвигл еси разоренный, тридневен из гроба, якоже обещал еси Блаже: да воистинну скажеша славу Твою, юже нам источаеши верою, узы разрешив, ихже держаше древле ад связанных.

О иудейское безумие! о неистовство беззаконных! Что неверное видевшие, не веровасте Христу? яко немощныя, не словом ли воздвиже? Или яко весь мир Той не спасе ли, да уверяют вас поне воины, или воскресшие из мертвых.

О мертвевшийи стражие ныне да глаголют, како украден бысть, Егоже не видеша неразумнии всегда? Аще бо воскресша не видеша, ни ощутиша, како украдена Сего разумети можашу когда? Да уверит вы поне камень сей, и погребальная Христова.

Что яко мертва блюдете? что печати на камени положиште еврею, страхом боящегося крадения? Се воистинну гроб запечатлесе: како убо воскресе, аще не бы Бог был Христос? Да уверяют вы воскресшийи, и видени бывшийи многими.

Слава: Со Отцем славим Сына, и Духа Святого, вопиюще непрестанным гласом: Троице единственное Существо, помилуй, спаси вся, в трех Лицах Единице ущедривши, препрославленный Боже во веки.

И ныне, Богородичен: Во чреве Твоем Пречистая, како вместила еси Младенца, Егоже трепещут силы ангельския яко Бога? Разве якоже восхоте, якоже вестъ вселися, вся спасти хотяй от Адама земнородныя, разрешивый Адама клятвы оныя, снедию горькою.

И святого Минея на 4.

Песнь 8.

Ирмос: В купине Моисею Девы чудо, на Синайстей горе, прообразившаго иногда пойте, благословите и превозносите во вся веки.

Солнечныя зари спрятахуся страхом Христовых страданий, и востаяху мертвии, и горы прекланяхуся, и колебашеся земля, и ад обнажашеся.

В пещи сущии иногда треблаженнии отроцы возвышающе руки, проображаху Блаже пречестный Крест Твой, имже низложил еси Христе вражию силу.

О иудее слепии прелестницы и преступницы, Христову Воскресению неверующии, яко ложному: что неверное видите, яко воскрес Христос, мертвыя воздвигый?

О иудее врази, аще и нам не веруете, ваша воины вы вопросите, что пострадала они? Кто отваливый руками камень от гроба?

Кто просветивый слепцы, и прокаженных очистивый, и хромыя исправивый, и пешествовавый море немокренно яко сушу, аще не Христос Бог, мертвыя воздвигнувый?

Кто воздвигнувый мертвца четверодневна из гроба, вдовича сына? кто стягнувый яко Бог разслаблена на одре, аще не Христос Бог, мертвыя воздвигнувый?

Благословим Отца, и Сына, и Святого Духа Господа.

Со Отцем Сына, и Духа Святого Святую Троицу в Божестве едином прославляем, вопиюще: Свят, Свят, Свят еси во веки.

И ныне, Богородичен: Во чреве Твоем Чистая, присноживотный хлеб, смешенный несмесо, смешением нашим, родила еси непреложно единого Христа Бога во двою существу.

И святого Минея на 4.

Поем Честнейшую:

Песнь 9.

Ирмос: Преестественно плотию заченшую во чреве, от Отца безлетно

предвозсиявшее Слово, в песнях немолчных величаем вернии.

Иже на Кресте разбойника познавша Тя Бога, наследника соделал еси мысленному раю, еже помяни мя вопиюща, Всесильне Спасе.

Заушен нас ради, и оплеван был еси Иисусе от беззаконников, скрижали закона начертавый в Синаи, угоднику Моисею.

Оцта и желчи Спасе, напоен был еси нас ради, давый нам тело и честную кровь, в снедь же и питье вечныя Твоя жизни.

В животворная ребра копием прободен быв Христе, пречистую Твою кровь, и честную воду источил еси миру, яко присноживотный источник.

Вменился еси в мертвых, оживлей мертвые: во гробе положен еси, истощивый гробы: пленил еси ад, воскресив Адама.

Воскресл еси Иисусе, связан бысть враг, пленился ад, испразднишася гробы, восташа дольнии, покланяющиеся Тебе Христе.

Слава: **Б**езначален еси Отче, несозданен еси Сыне, сопрестолен и Душе Святой, едино [Сия три] Естеством, и три Лицы, едине Боже истинный.

И ныне, Богородичен: **Д**а веселится Иисей, да ликовствует и Давид: се бо Дева Богорасленный жезл прозябе, цвет присноживотный Христа.

И святого Минея на 4.

Катавасия: Светися, светися

Ексапостиларий мироносицам:

Жены услышите глас радования: мучителя ада поправый, от тли мир воздвиже, тещите, другом рцйте Моим благовестия: хочу бо создание Свое радостию озарити, отонудуже прииде печаль. **[Дважды.]**

Слава и ныне, тойже.

На хвалитех поставим стихи 4, и поем настоящие стихиры, глас 2-й:

Всякое дыхание и вся тварь, Тя славит Господи, яко Крестом смерть упразднил еси, да покажеша людям, еже из мертвых Твое Воскресение, яко един Человеколюбец.

Да рекут иудее, како воины погубиша стрегущии Царя? почто бо камень не сохрани Камене жизни? Или погребеннаго да дадут, или Воскресшему да поклонятся, глаголюще с нами: слава множеству щедрот Твоих, Спасе наш, слава Тебе.

Радуйтесь людие и веселитесь, ангел седяй на камени гробнем, той нам благовести, рек: Христос воскрес из мертвых, Спас мира, и исполни всяческая благоухания: радуйтесь людие и веселитесь.

Ангел убо еже радуйся, прежде Твоего зачатия Господи, Благодатней

принесе: ангел же камень славнаго Твоего гроба в Твое Воскресение отвали: ов убо в печали место, веселія образы возвещая: сей же в смерти место, Владыку Жизнодавца проповедуя нам, темже вопием Ти: Благодетелю всех, Господи слава Тебе.

Слава, и ныне: глас 1-й:

Приидоша на гроб Магдалина, и другая Мариа ищуще Господа, и ангела видеша яко молнию сядяща на камени, и глаголюща им: что ищете живаго с мертвыми? воскресе, якоже рече: в Галилеи Его обрящете. К Нему же возопиим: воскресый из мертвых, Господи слава Тебе.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры праздника, глас 2-й:

Подобен: Егда от Древа:

Егда от Древа Тя мертва, Аримафей снят всех Живота, сминою и плащаницею Тя Христе обвив, и любовию подвизашеся, сердцем и устнами тело нетленное Твое облобызати. Обаче одержимъ страхом, радуяся вопияше Ти: слава снисхождению Твоему, Человеколюбче.

Стих: Благоволил еси Господи землю Твою:

Егда во гробе нове за всех положился еси, Избавителю всех, ад всесмехливый виде в Тя ужасеся, верей сокрушишася, сломишася врата, гроби отверзошася, мертвии востаху. Тогда Адам благодарственно радуяся вопияше Тебе: слава снисхождению Твоему, Человеколюбче.

Стих: Милость и истина сретостеся:

Егда силы зряху Тя Христе, яко прелестника от беззаконных оклеветаемъ, ужасавшася неизглаголанному долготерпению Твоему, и камень гроба руками запечатанный, имиже Твоя нетленная ребра прободоша. Обаче нашему спасению радующеся вопияху Ти: слава снисхождению Твоему, Человеколюбче.

Слава, и ныне: глас 6:

Проси Иосиф тело Иисусово, и положи е в новом своем гробе: подобаше бо Ему из гроба, яко от чертога пройти. Сокрушивый державу смерти, и отверзый врата райская человеком, Господи слава Тебе.

Таже, Благо есть исповедатися Господеву

Трисвятое. И по Отче наш:

Тропари праздника, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава: глас тойже.

Егда снизшел еси к смерти, животе бессмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя зываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явился чуждъ. Но возопийте: воскресе Господь, подай миру велию милость.

Таже ектения: Помилуй нас Боже:

Час 1. И отпуст.

В СУББОТУ 3-Й СЕДМИЦЫ ПО ПАСХЕ

На Литургии,

Блаженна, песнь 9-я на 6. Прокимен и Аллилуиа праздника.

Иже на Кресте разбойника познавши Тя Бога, наследника соделал еси мысленному раю, еже помяни мя вопиюще, Всесильне Спасе.

Заушен нас ради, и оплеван был еси Иисусе от беззаконников, скрижали закона начертавый в Синаи, угоднику Моисею.

Оцта и желчи Спасе, напоен был еси нас ради, давый нам тело и честную кровь, в снедь же и питье вечныя Твояе жизни.

В животворная ребра копием прободен быв Христе, пречистую Твою кровь, и честную воду источил еси миру, яко присноживотный источник.

Слава: **Б**езначален еси Отче, несозданен еси Сыне, сопрестолен и Душе Святой, едино [Сия три] Естеством, и три Лицы, едине Боже истинный.

И ныне, Богородичен: **Д**а веселится Иессей, да ликовствует и Давид: се бо Дева Богорасленный жезл прозябе, цвет присноживотный Христа.

По входе тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

И тропарь, глас 2-й:

Егда снизшел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И тропарь, глас 2-й:

Мироносицам женам, при гробе представ ангел вопияше: мира мертвым суть прилична, Христос же истления явился чуждь. Но возопийте: воскресе Господь, подай миру велию милость.

И храма святого: И тропарь святого, аще есть. Аще ли будет и другого святого тропарь, то рцы его: таже кондак храма. Слава: святого. Аще ли будет и другого святого кондак, такожде рцы его.

И ныне: таже кондак праздника, глас 2-й:

Радоватися мироносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскресе от гроба.

Прокимен, глас 6-й: Спаси Господи люди Твоя, * и благослови
достояние Твое.

Стих: К Тебе Господи воззову, Боже мой, да не премолчиши от мене.

Апостол Деяний, зачало 22. [Деян. 9, 20 – 31.]

Во дни оны, Павел с сущими в Дамасце учениками на сонмищих проповедаше Иисуса, яко Сей есть Сын Божий. Дивляхуся же вси слышащии и глаголаху: не сей ли есть гонивый во Иерусалиме нарицающий имя сие, и zde на сие прииде, да связаны тыя приведет ко архиереем? Савл же паче крепляшеся и смущаше иудей живущия в Дамасце, препирая, яко Сей есть Христос. Якоже исполнишася дние доволни, совещаща иудее убить его, Уведен же бысть Савлу совет их: стражаху же врат день и ночь, яко да убьют его: Поемше же его ученицы ночью, свесиша по стене в кошнице. Пришед же Савл во Иерусалим, покушашеся прилепятся учеником: и вси бояхуся его, не верующе, яко есть ученик. Варнава же приемь его, приведе ко апостолом и поведи им, како на пути виде Господа, и яко глагола ему, и како в Дамасце дерзаше о имени Иисусове. И бяше с ними входя и исходя во Иерусалим и дерзая о имени Господа Иисуса. Глаголаше же и стязашеся с еллинами: они же искаху убить его. Разумевше же братья, сведоша его в Кесарию и отпустиша его в Тарс. Церкви же по всей Иудее и Галилеи и Самарии имеяху мир, созидающаяся и ходяща в страхе Господни, и утешением Святаго Духа умножахуся.

Аллилуиа, глас 8-й: Благоволил еси Господи землю Твою, возвратил еси
плен Иаковль.

Стих: Милость и истина сретостеся, правда и мир облобызастася.

Евангелие Иоанна, зачало 52. [Ин. 15, 17 – 16, 2.]

Рече Господь Своим учеником: сия заповедаю вам, да любите друг друга. Аще мир вас ненавидит, ведите, яко Мене прежде вас возненавиде: Аще от мира бысте были, мир убо свое любил бы: якоже от мира несте, но Аз избрах вы от мира, сего ради ненавидит вас мир. Поминайте слово, еже Аз рех вам: несть раб болий господи своего: аще Мене изгнаша, и вас изженут: аще слово Мое соблюдоша, и ваше соблюдут: Но сия вся творят вам за имя Мое, яко не ведут Пославшаго Мя. Аще не бых пришел и глаголах им, греха не быша имели: ныне же вины {извинения} не имут о гресе своем: Ненавидяй Мене, и Отца Моего ненавидит: Аще дел не бых сотворил в них, ихже ин никтоже сотвори, греха не быша имели: ныне же и видеша, и возненавидеша Мене и Отца Моего: Но да сбудется слово, писанное в законе их, яко возненавидеша Мя туне. Егда же придет Утешитель, Егоже Аз пошлю вам от Отца, Дух истины, Иже от Отца исходит, Той свидетелствует о Мне: И вы же свидетелствуете, яко искони со

Мною есте. Сия глаголах вам, да не соблазнитесь. От сонмищ ижденут вы: но придет час, да всяк, иже убьет вы, возмнится службу приносить Богу.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Хвалите Господа с Небес, хвалите Его в Вышних.
Аллилуиа, [трижды]